

摘藻堂四庫全書薈要

經部

欽定四庫全書叢要

經部

禮記集說卷五十四



詳校官編修臣程嘉謨


欽定四庫全書舊要卷二千一百八十二

經部

禮記集說卷五十四

宋 衛湜 撰

禮運第九

 氏曰案鄭目錄云名曰禮運者以其記五帝三王  
相變易陰陽旋轉之道此於別錄屬通論

橫渠張氏曰禮運本是大片段文字混混然一大意  
須是據大體而觀之乃能見若句句字字細碎求之  
必不能得嘗觀禮運有時混混然若身在太虛中意

思弘大然不能得久不惟禮運要作一大意觀之如中庸儒行亦當如是或謂間有害處據大體觀之自是大片段文字以已心難包管盡他意如天降甘露地出醴泉若堯舜之世實求此物則安得也但言其至和可致不必須有此

山陰陸氏曰禮運者是禮樂之運非道德之運蓋運祚推移而禮行焉雖聖人不能違也然則大同小康時而已矣

長樂陳氏曰形而上者謂之道形而下者謂之器道則運而無所積器則滯而有所拘禮器言禮之器則禮運言禮之道也

嚴陵方氏曰行於萬物者道也載道而行者禮也帝王盛時以義起禮驅騁而轉徙未嘗息故其經世之迹不能無異其軌轍焉於是則有大小之別同異之名矣此篇所言乃其義也

昔者仲尼與於蜡賓事畢出遊於觀之上喟然而嘆仲

尼之嘆蓋嘆魯也言偃在側曰君子何嘆孔子曰大道之行也與三代之英丘未之逮也而有志焉

鄭氏曰蜡者索也歲十二月合聚萬物而索饗之亦祭宗廟時孔子仕魯在助祭之中觀闕也孔子見魯君於祭禮有不備於此又覩象魏舊章之處感而嘆之言偃孔子弟子子游大道謂五帝時也英俊選之尤者逮及也言不及見志謂識古文不言魯事為其太切廣言之

孔氏曰此篇凡四段自此至小康為第一明孔子為  
禮不行而發嘆遂論五帝三王優劣之事鄭引郊特  
牲十二月蜡據周言之夏則十月殷則十一月謂建  
亥之月也以萬物功成報之案月令孟冬云大割祠  
于公社臘先祖五祀故鄭云亦祭宗廟總而言之謂  
之為蜡若析而言之祭百神曰蜡祭宗廟曰息民故  
鄭註郊特牲云息民與蜡異此據總而言之故祭宗  
廟而云與於蜡賓也下云出遊於觀之上故知是祭

宗廟也以仲尼與蜡祭故鄭知仕魯也魯臣而稱賓者以祭祀欲以賓客為榮故也爾雅釋宮云觀謂之闕孫炎云宮門雙闕者舊縣法象魏使民觀之處因謂之闕亦名象魏魏巍也其處巍巍高大也何休註公羊天子兩觀外闕諸侯臺門則諸侯不得有闕魯有闕者魯以天子之禮故得有之也公羊傳云設兩觀乘大路此皆天子之禮是也案定二年雉門災及兩觀魯之宗廟在雉門外左孔子蜡祭事畢出廟門



往雉門登遊於觀之上喟是嘆之形貌作記者言其所嘆之由言蓋者謙為疑辭不敢指正於是言偃問嘆何事孔子若指言魯失禮恐其太切故廣言五帝以下之事謂五帝大道之行并與三代英異之主若禹湯文武等雖不及見而有志記之書尚可知也志是記識之名案辨名記云倍人曰茂十人曰選倍選曰俊千人曰英倍英曰賢萬人曰傑倍傑曰聖觀熊氏曰當門闕處以通行路言雙闕明門之兩旁相對

為雙也遊目看於觀之上

嚴陵方氏曰助祭者必有飲食以勞之故謂之賓焉  
文王世子於釋菜言退賓者以此大道之行謂五帝  
之上也三代之英謂三王之時也以其無名無迹故  
以道稱之以其代廢代興故以代稱之禮至於三代  
其文極矣故以英言之言三代之為英以見五代之  
為質以五帝為大道之行則知三代為大道之隱矣  
時繫乎聖人之在上者也孔子以窮而在下不得其

時故其言如此然時無常也或可待焉故止言未而已

蔣氏

君實

曰禮莫重於祭祭莫重於蜡故記禮之君

子首以夫子蜡賓之嘆而發諸禮運之篇考之於經蜡之始末郊特牲論之詳矣夫子又嘗與子貢言蜡則曰百日之蜡一日之澤非賜之所知何哉其可知者蜡之祭也其不可知者古先聖王之遺風餘澤也古者上下之間勢位未隔文法未備而歲時蜡禮之

講終以序飲其重農力本存愛示情之意見於祈祝  
禱禳之間勞來勸相之際仁之至義之盡粵自王政  
不修而典禮在魯者望魯之意謂其一變而至於道  
而不可與他國槩言者也今也聖人傷世偽之寢起  
知古典之無傳而於蜡賓畢事之後出為觀上之游  
喟然為之太息記者紀其所嘆在魯不知魯之為蜡  
其能盡存於古否乎魯之郊禘非禮也其蜡可知矣  
然則發蜡之旨微矣聖人傷古治之不復因蜡禮而

有見不有偃也為之發問則何以窮夫子感嘆之機  
夫既以帝者之事為大同而指三代為小康矣而均  
曰未之逮也而有志焉何哉此有以見聖人思欲還  
上古之風而不可得而猶思其次也故其下歷歷言

之

篇內同

講義曰夫蜡之祭為仁之至義之盡先王報祭之禮  
為息且有休老勞農之事孔子既與蜡賓而觀之以  
知當時雖足以得古之禮而未足以得古人為禮之

意此大道所以未行也故孔子喟然而嘆魯焉

大道之行也天下為公選賢與能講信修睦故人不獨親其親不獨子其子使老有所終壯有所用幼有所長矜寡孤獨廢疾者皆有所養男有分女有歸貨惡其棄於地也不必藏於己力惡其不出於身也不必為己是故謀閉而不興盜竊亂賊而不作故外戶而不閉是謂大同

鄭氏曰公共也禪位授聖不家之睦親也不獨親其

親子其子孝慈之道廣也皆有所養無匱乏也有分  
分猶職也有歸皆得良輿之家也貨不必藏於己力  
不必為己謂施無吝心勞事不憚仁厚之教也謀閉  
不興盜賊不作尚辭讓之故也外戶不閉禦風氣而  
己同猶和也平也

孔氏曰此以下說記中之事此先明五帝時也為公  
謂不私傳子孫即廢朱均而用舜禹是也選賢與能  
謂不世諸侯黜四凶舉十六相之類是也講談說也

修習也世淳無欺說輒有信所習皆親睦也君旣無私故人法之不獨親其親子天下之老者皆得贍養終其餘年年齒盛壯者不愛其力重任分輕任并斑白者不提挈是也幼者皆獲養長以成人無告及有疾者皆獲恤養男子無才者耕有能者仕各當其職無失分也女謂嫁為歸不失時故有歸也貨謂財貨旣天下共之不獨藏府庫但人不收錄則物壞世窮無所資用故收而藏之是惡棄地耳非是藏之



為己有乏者便與也為事用力不憚劬勞正是惡於相欺惜力不出於身非是欲自營贍故云不必為己謀起於詐今天下一心故圖謀之事閉塞不起興起也有乏輒與盜竊焉施有能必位亂賊何起外戶扉從外闔也不閉者不用關閉之也重門擊柝本禦暴客既無盜竊亂賊則戶無俟於閉也但為風塵入寢故設扉耳無所捍拒故從外而掩也率土皆然故曰大同

橫渠張氏曰大道之行窮乏皆有養者蓋民足固自

如此菽粟如水火民焉有不仁者哉聖人富之固有  
其術其教之又深順達大道行也孔子言王者必世  
而後仁仁即大道之行也以孔子之道行之三十年  
何患乎不仁也言仁固有淺深三年有成言治一國  
也及治天下則必世也周公之法不止此但成王不  
能繼之大道之行由禮義而行者也禮義以為紀行  
禮義者也紀對綱而細今規規然以禮義治其小禮

義而施於小未及其大者也若夫大道之行則禮義沛然大道之行游心於形迹之外不假規規然禮義為紀以為急夫何為哉恭己正南面而已矣雖則無為亦未嘗忘禮義以為紀蓋不可無也

長樂劉氏曰五帝之治世質民純人人內盡其情而情不生外無其已而善益勸故君不自尊而天下共尊之臣不自賢而天下共賢之一德安於上而兆民莫不化之一善出於人而四海莫不師之是以選賢

與能講信修睦不必自於朝廷而族黨人人公共推讓不敢以為己私也雖以天下讓於人而人不以為德雖以天下外於子而人不以為疏故不謹於禮而人無作偽以踰於中不由於樂而人無縱情以失其和易稱同人于野亨者言君盡其性於上而民盡其性於下有天火之義焉不曰大道之行乎

長樂陳氏曰大道之行為大同大道之隱為小康以道之污隆升降係乎時之不同而已蓋大道者禮義

之本禮義者大道之末任其本則末存乎其間徇其  
末則本隱而無存此堯舜所以為大同而禹湯文武  
成王周公所以為小康也莊子述伯成子高對禹之  
辭堯治天下不賞而民勸不罰而民畏今子賞而民  
且不仁德自此衰刑自此立大同小康之辨也夫大  
道之行天下為公而與人大道既隱天下為家而與  
子與人與子固出於天聖人所以順天而趨時也然  
其為公者非不家之以為公者為主為家者非不公

之以為家者為主至於不獨親其親不獨子其子貨力不必藏於己非無所別也各親其親各子其子貨力為己非無以待人也亦其所為主者異矣選賢與能講信修睦六君子非不由之禮義以為紀堯舜非不用之特其有所輕重淺深煩簡之不一耳蓋上世之選賢則一於德而已後世之選賢則有及於勇知上世之信則出於精誠之中而後世之信則見於作誓作會之際上世之睦則和光同塵而有餘後世之

睦則魚沫啣濡而不足上世則有道德以為綱而不止於禮義之紀後世則禮義以為紀而有失於道德之綱也

嚴陵方氏曰選言擇之而進與言待之而舉有諸己之謂信交相親之謂睦信與睦人皆有之然有諸己者患其隱而已故講之使明交相親者患其壞而已故修之使著廢疾瘖聾跛躄之類所謂皆有常餽各以其器食之是也天生其利人乃不取是以人逆天

也故貨棄於地為可惡人犯其勞我享其效是因人成事也故力不出於身為可惡取非其有謂之盜伺間而發謂之竊絕理謂之亂毀則謂之賊

馬氏曰信者在中之誠講之者使之以信相考也睦者在內之和修之者使之以睦相守也男有分女有歸言使之各得其所也有所厚有所薄有所貪有所吝則機心作於內而盜竊亂賊興於外無所厚無所薄無所貪無所吝則機心盜賊兩皆泯矣如此然後



外戶可以不閉而天下如是一也

山陰陸氏曰言大道之行天下為公而曰選賢與能  
講信修睦是乃所以異乎黃老之言也且選賢與能  
講信修睦在六君子之世未嘗廢也而大道之行異  
乎此者不家之而已難者曰天下為公是天與賢則  
與賢天下為家是天與子則與子孟子以為其義一  
也不足為時之厚薄曰自後世觀之類皆與子一有  
不爾則爭亂隨之是亦天也雖以為時之厚薄可矣

而緩詞也即云謀閉不興盜竊亂賊不作外戶不閉嫌其言不婉是謂大同此禮之運轉在天者也

延平周氏曰以大道既隱為三代則大道之行為堯舜然大道之行以天下為公亦非不以天下為家大道之隱以天下為家亦非不以天下為公故孟子以為其義一也又豈足為時之厚薄哉蓋各親其親不獨親其親各子其子不獨子其子者二帝三王之所同也

蔣氏曰大道之行天下為公居上者恬於勢位而不以為樂在下者安於困貧而不以為尤是以德化自行而防範不立情意易通而機巧不生故位以賢能而任非有所私而立之也人以信睦為交非制之使從也推而至於耆老幼壯鰥寡孤獨之人交相養於天地之間而不見其病男自然而有分女自然而有歸貨惡其棄於地而已力惡其不出於身而已是豈有一毫相攘相軋之習哉凡若此者非聖人用力而

致之也故揚而舉之於大同之時惟帝者之事足以當之

今大道既隱天下為家各親其親各子其子貨力為已大人世及以為禮城郭溝池以為固禮義以為紀以正君臣以篤父子以睦兄弟以和夫婦以設制度以立田里以賢勇知以功為已故謀用是作而兵由此起禹湯文武成王周公由此其選也此六君子者未有不謹於禮者也以著其義以考其信著有過刑仁講讓示民有

常如有不由此者在執者去衆以爲殃是謂小康

鄭氏曰隱猶去也為家謂傳位於子貨力為已俗狹  
畜也大人諸侯也亂賊繁多為城郭溝池以服之也  
謀用是作兵由此起以其違大道敦朴之本也教令  
之稠其弊則然老子曰法令滋章盜賊多有由用也  
由此其選能用其禮義以成治也考成也刑猶則也  
執執位也去罪退之也殃猶禍惡也康安也此謂小  
小安康之世不如大道大同之世也言小安者失禮

則賊亂將作矣

孔氏曰此明三代俊英之事孔子生及三代之末故稱今也天下為家禹為其始也君以天位為家故四海各親親而子子藏貨於身出力贍已父子曰世兄弟曰及謂父傳與子無子則兄傳與弟以此為禮也城內城郭外城溝池城之澁為此以自衛固也紀綱紀也五帝以大道為綱三王以禮義為紀君臣父子兄弟夫婦有失並用禮義以紀之也君臣義合故曰

正父子天然故曰篤篤厚也兄弟同氣故曰睦夫婦異姓故曰和又用禮義設為宮室衣服車旗飲食上下貴賤之制度田種穀稼之所里居宅之地貴賤異品也賢猶崇重也盜賊並作故須勇更相欺妄故須知所以崇重勇知之士立功起事不為他人故姦詐之謀用而戰爭之兵由此而起禹湯等能用此禮義成治其為三王中之英選也此聖賢六人皆謹於禮以行下五事用禮明斷使得其宜用禮以成人之信

用禮以明民之罪仁者以禮賞之以為則爭奪者以禮講說之使推讓是示民為常法也為君而不謹於禮以下五事雖在富貴執位衆人必以為禍惡共以罪黜退之也

橫渠張氏曰大道既隱以其不講故民不見也然則大道既隱有劣於大道之行大道之行如堯舜方是也雖三代之英猶有劣者以其未成功也此所以未有不謹於禮惟謹於禮則所以致大道之行各親其



親各子其子亦不害於不獨親不獨子止是各親各子者恩差狹至於順達之後則不獨親其親不獨子其子既曰不獨親親子子則固先親其親子其子矣大人世及以為禮由古以來固亦有傳世但道隱之後雖有子如均朱有臣如伊周者亦不能舉行堯舜之事故以世及為定禮城郭溝池為固亦是禮義以為紀之事所以防亂也堯舜在位各歷年七十餘以至於人神和龜龍格是為大治不規規以禮義為紀

六君子所以急於禮者欲至于大同也堯舜之治若此莫不本諸禮義大道既隱由暴君以壞之也然而使堯舜承桀紂之後亦當以禮義為紀六君子居堯舜之時是亦大同之治也以其襲亂急於禮義適得小康耳聖人成性一之以義理禮義為紀固在術內然而六君子未有不謹於禮欲以達其大者也謀用是作而兵由此起大道既隱則人有彼我故謀作亂者兵也止亂者亦兵也謀所以慮亂也既有亂則須

兵以制之禹繼堯舜者也恐殆非為大道既隱之時  
由此其選於三代中是精選者也

長樂劉氏曰既隱謂夏商以後有其居處而彼已分  
矣私其貨力而竊盜起矣戰鬪刑禁由之生焉故有  
五禮防其偽而教之復於中也有六樂防其情而教  
之復其和也綱人之倫以五品紀人之性以五常制  
度不定則僭倂興田里不疆則侵吞起勇智不用則  
禍亂生謀慮不作則姦詐出小則五刑以扶典制大

則九伐以立平康此禹湯文王武王成王周公所以  
謹於禮較於大道則為小康焉

嚴陵方氏曰前言大道之行則知大道隱之為廢此  
言大道既隱則知大道行之為明矣前言天下為公  
則以與賢故也故繼言選賢與能此言天下為家則  
以與子故也故繼言各親其親各子其子焉大人世  
以為禮則各子其子故也及以為禮則各親其親故  
也大人止謂有位者與說大人則貌之之言同道大

而有變則為之綱者道也禮義小而有常故以為紀  
焉道之綱則君臣固有義矣父子固有親矣兄弟固  
有序矣夫婦固有別矣及以禮義為紀則因其義而  
正之因其親而篤之因其序而睦之因其別而和之  
故曰以正君臣以篤父子以睦兄弟以和夫婦以功  
為已則致力以興事者各自營故也禮義之紀如此  
所以治人之道悉矣則機心不能無作爭端不能不  
起故曰謀用是作而兵由此起

馬氏曰以大道之行而方之大道之隱固甚於天地之殊也竊嘗言之天下為公天下為家傳於賢傳於子皆天之所與非人力之所能為也五帝三王何與焉不獨親其親不獨子其子則近於墨矣各親其親各子其子則近於楊矣聖人豈楊墨之道乎老有所終至廢疾有所養三王未始不同也以正君臣至以功為己五帝之時莫不行也謀閉而不興盜竊亂賊而不作三王之盛時莫不胥然謀用是作則兵由此

起五帝以來亦未始不如此也由是而考之則記者之言妄歟嘗聞之師曰方周之衰文之滅質也久矣天下之人溺於人偽喪其天真孔子傷時之弊故推隆於五帝而以三代為劣過其實以矯之欲使復歸於至德之盛裁歸於文質之中而已故曰先進於禮樂野人也夫孔子非必以先進為可尚以時之弊必過其中以矯之使質過於文然後朴可得而復也故曰如用之則吾從先進大同小康之意槩可見矣

山陰陸氏曰以今該古不欲斥前也大人得位者也  
若五帝時非無父子相繼兄弟相及非無城郭溝池  
非無禮義特不以為固不以為紀以正君臣以篤父  
子以睦兄弟正尚義故篤尚恩故睦尚親故以和夫  
婦者婦雖以從夫為正亦有可否相濟以功為已愈  
益下矣莊子曰為義偃兵造兵之本也蓋禮義雖可  
以息兵亦可以起兵以著已之義以考已之信著人  
之有過若丘也幸苟有過人必知之周公之過不亦



宜乎以有禮著焉故也仁以有禮故刑讓以有禮故講若虞芮質厥成是也虞芮講讓而文王之仁刑矣禮示民有常易示人有變

廬陵胡氏曰鄭云大人諸侯也案下云禹湯由此則大人謂天子禮以明義禮以成信禮以明罪禮以刑仁刑猶型也禮以明讓禮以體常

長樂陳氏曰其言示民有常者常者變之對變者能變則常者能化化者人之道變者天地之道易之坤

卦言人之道則曰有常曰化光至於乾卦言天之道則曰無常曰變化帝則盡天道故不言常王則盡人道故止於有常而已

延平周氏曰禮義以為紀以下至於賢勇知此謀用不作而兵所以不起者也以為謀用是作兵由此起非也

蔣氏曰馴至乎王者之時則不同矣天下為家自夏后氏始禹之為君豈不知堯舜與賢之事為可美哉

啟賢而能敬承此不待論而天下之事亦大異矣自禹而往乃家天下蓋聖人以道御時初無容心於其間也名位以安之政教以率之刑法以一之誥誓以申之此豈得已而不已哉利欲動而姦詐起生聚衆而情隙開聖人而不為之盡心焉則蓋有所不滿焉者故自夏后氏之與子而天下之為君臣父子者自此無異說則各親其親各子其子貨力為已王者豈能遽返而還其初乎要亦求勿失其情而已祿爵世

及以為大人之禮城郭溝池以為國家之固禮義以  
為人道之紀君臣不得不正父子不得不篤兄弟不  
得不睦夫婦不得不和制度不得不設田里不得不  
立勇智任之為賢為已舉之為功義必使著信必使  
考仁必使成遜必使習道不能由則位不能居至是  
而禮之功用形矣故聖人揭而舉之為小康之時夫  
禹湯文武成王周公由此其選而謂之小康若是其  
不足言乎曰小康之名非治說也乃時說也聖人處

大同之時故能運無為之化聖人處小康之時要亦無不盡之心夫惟無不盡之心而後能居小康之時成極治之化當大道之隱使大道之行以此言之則知帝王有異時無異道聖人因蜡以思禮其不能無望於魯而有志於帝王之世者如此

言偃復問曰如此乎禮之急也孔子曰夫禮先王以承天之道以治人之情故失之者死得之者生詩曰相鼠有體人而無禮人而無禮胡不遄死是故夫禮必本於

天穀於地列於鬼神達於喪祭射御冠昏朝聘故聖人以禮示之故天下國家可得而正也

鄭氏曰相視也遘疾也言鼠之有身體如人而無禮者矣人之無禮可憎賤如鼠不如疾死之愈也聖人則天之明因地之利取法度於鬼神以制禮下教令也既又祀之盡其敬也教民嚴上也鬼者精魂所歸神者引物而出謂祖廟山川五祀之屬也民知嚴上則此禮達於下也民知禮則易教

孔氏曰此是第二明須禮之意失之者死若桀紂也  
得之者生若禹湯也引詩鄘風相鼠篇禮從天出故  
云本於天殺效也又效於地布列於鬼神聖王既法  
天地鬼神以制禮本以教民故祀天禋地享宗廟祭  
山川一則報其禮之所來之功二則教民嚴上之義  
民既知嚴上之義曉達喪禮則知哀篤君親也祭是  
享祀君親射御是防衛供御尊者冠有著代之義昏  
有代親之感朝是君之敬上聘是臣之事君人知嚴

上則達此八者之禮天下謂天子國謂諸侯家謂卿大夫下既從教故得而正也鄭註則天之明因地之利昭二十五年左傳文云取法度於鬼神者下文云降於宗廟山川五祀是也云以制禮下教令者謂法天地鬼神以制禮既畢下此禮之教令以教民即下文降命降則下也謂法此等之神以下教令又祀此等之神教民嚴上故鄭云既又祀之盡其敬也宗廟山川五祀據其精魄歸藏不知其所則謂之鬼宗廟



能引出仁義山川能引出興作五祀能引出制度又俱能引出福慶謂之神也三者皆為鬼神此又本天殽地之下所以總云列於鬼神也

橫渠張氏曰禮必本於天殽於地列於鬼神此屬自然而言也天自然有禮如天尊地卑是也殽於地明於地也如山川有小大草木有長短皆是天生而見於地也列於鬼神遍於鬼神也如社有土功履之必報稷有養人之功五嶽各為一方之鎮人就而禮之

至於羣祀百神莫不有自然之理使之必報之功有  
小大者天也報且禮之者人也達於喪祭射御冠昏  
朝聘此則屬人道而言亦莫非天理也 又曰禮本  
於天天無形固有無體之禮禮有形則明於地明於  
地則自山川宗廟五祀百神以至達於喪祭射御冠  
昏朝聘是見於迹也蓋禮無不在天所自有人以節  
文之耳本於天殽於地猶是總言之鬼神則布列於  
地上也然則禮非自人而出至於鳥獸莫不有父子

配偶長幼朋友螻蟻之君臣鴻鴈之兄弟但不能推類而有別此亦皆天性也至聖人則能粹美之

長樂劉氏曰先王正心誠意動必如禮者欲盛厥德以配天地也不曰承天之道乎禮有定制執民兩端不敢過也不敢不及也不曰治人之情乎人失乎禮則行悖於中刑禍之道也不曰死乎人得其禮則動協於極不曰生乎鼠也無其一體無不死者人也失其一禮而能久生哉故禮也者能使三才安於其位

而不失其宜者也故天得其禮則陰陽和地得其禮則剛柔順而無乾亢之患鬼神得其禮則生以時而無咎徵之失至於喪祭射御冠昏朝聘得其禮則君臣父子兄弟夫婦朋友各得其分而不失其常不曰天下國家可得而正乎則人之為道無禮焉性命不可得而正矣若網之有綱萬目待之然後理若木之有規萬器待之然後成惟禮為然

長樂陳氏曰言偃聞去衆為殃之說復以禮之急為

問孔子謂禮出於天而成體則於天之道為本故以之承天之道出於人而成法則於人之情為本故以治人之情夫出於天而承天出於人而治人則禮不為不重其有不由而失之則不止於去衆為殃而必至於死由而得之則不止於存衆為祥而必至於生也喪祭內也射御外也冠昏內也朝聘外也君子行其在已而不忘其在人者為其在人而不忽其在已者然後為能盡已而盡人此喪祭射御冠昏朝聘先

後之意 又曰本於天者禮之道殽於地者禮之體  
列於鬼神者禮之情達於喪祭射御冠昏朝聘者禮之  
度數禮之為道則尊而其體則卑其情則幽而其度數  
則顯聖人以此示人則天下國家可得而正也

嚴陵方氏曰上言如有不由此者在勢者去則禮之  
於人不可緩矣故言偃復問以為如此乎禮之急也  
禮本乎天之道故先王制禮所以承天之道禮出乎  
人之情故先王制禮還以治人之情禮於天人之際

如此則失之者死得之者生未足恠也然失之者未必死以其有死之道而已得之者未必生以其有生之道而已故引詩胡不遄死之說以明之也夫苟失於禮雖或幸而生於義可誅則無以異乎死苟得於禮雖或不幸而死其名不忘則無以異乎生此所以有死生之道也人之所欲莫甚於生所惡莫甚於死禮之得失遂有生死之道也此其所以為急歟於天曰本於地曰殽於鬼神曰列皆言禮之所以立也至

於禮之所以行則有見於喪祭射御冠昏朝聘焉見於喪祭射御冠昏朝聘則禮達於下矣故以達言之喪則凶禮也祭則吉禮也射御則軍禮也冠昏則嘉禮也朝聘則賓禮也禮雖經而為三百曲而為三千其大體不過是五者而已

馬氏曰天降衷於民而先王之為禮所以繼天之衷也故曰以承天之道夫口之於味目之於色耳之於聲鼻之於臭四肢之於安逸人情之所同也人情之



所同而縱之則滅天理而窮人欲故先王制為禮以節之也故曰以治人之情胡不遄死者未至乎死而人欲其死也

延平周氏曰深於禮者可以言易深於易者可以言禮故言其成象則本於天言其效法則殽於地言其幽則列於鬼神所謂達於喪祭射御冠昏朝聘者乃其度數而已矣

山陰陸氏曰鬼神若禋祀實柴禋燎血祭貍沈鬴辜

禘祠烝嘗之類亦一隅爾喪祭射御冠昏朝聘此八者自天子下達凡所謂示象數之事也

鄭氏曰相鼠之刺不惟深疾之之辭而無禮無儀固有死之道也夫三百之經三千之儀雖若不勝其繁要皆此心之用操而常存者則委蛇曲折不失尺寸一念之差則視而勿見聽而勿聞食而不知其味語默動止皆非故態矣觀於草木則一葉之黃一枝之瘁皆本根之病也觀於天地則一星之殞一泉之決

皆元氣之病也聖人為禮以制天下之心威儀之中  
否以驗其神明精爽之存亡詎可指登降興俯獻酬  
裼襲以為末節而不之察乎先王盛時禮教達於天  
下士無賢不肖皆周旋於禮文之中其節奏度數耳  
目習焉手足安焉不得而少差也於安且習之中而  
忽乖其度是必其神明精爽之不在是也三代之衰  
列國公侯卿大夫猶知奉禮以從事一不中節則有  
死生禍福之說若越椒之執幣傲叔仲惠伯知其必

滅若敖氏之宗郤錡乞師於晉而將事不敬孟獻子知郤氏之必亡若此類者不可勝舉而其應信若龜筮蓋先王所以制人心之意猶未泯滅而秉禮君子既能以自檢其身故能以身察乎人也傳穀梁之說者以為左氏失之誣而後世學者不究其本遂以左氏死生禍福之說近於神恠而力排之聖人制禮精微之意微矣惜哉

蔣氏曰聖人傷世遠道散發明禮之為功學者因言

深意切申問禮之所以急聖人豈能忘言於此思昔  
先王之制為禮也非以強世拂情也蓋自有天地萬  
物而禮與之俱立羣而為之辨也合而為之防也出  
入飲食而為之會節䟽數也施報酬酢而為之等級  
隆殺也是豈天之所以能隨而付諸其人乎蓋必有制  
而命之者矣故曰承天之道又豈人之所能始而具  
之於天者乎蓋必有關而關之者矣故曰治人之情  
天道以承而能立人情以治而能定此禮所以不可

一日無而得失死生所由分也不然則天人之理窮矣相鼠之刺所關甚大托詩以明禮豈不信然又曰禮之為說虛為之機而實為之用理為之初而形為之顯自其本於天者而承之彼其理混然未分吾孰得其洪纖小大而為之乎易曰知崇禮卑崇效天卑法地方其為崇有不可得而擬議者聖人本天道之自然即地形而有辨故凡禮之所以為是因人之情順物之稱制為高下廣狹者皆其所效而立之者

也由是而築為宮室設為宗祧郊社以崇報山川以  
闡幽是列鬼神而禮有所寓矣喪祭有常射御有數  
冠昏以嚴其序朝聘以謹其儀是達於制作而禮有  
所行矣此三代聖人所以損益不同而制治之異至  
衰世之君子則未嘗不以禮之興脩廢弛而覘人之  
理亂安危者有由也

金華應氏曰上數語明禮之功用以明夫人生死之  
所由繫下四語總禮之體用以明天下國家治亂之

所由別也大原出乎天故推其所自出而本之效法  
之謂地故因其成法而效之殺效也列於鬼神者充  
塞乾坤之間昭布森列而不可紊也達於喪祭至朝  
聘者人道交際之用周流上下而無不通也法於天  
地鬼神者理也所以承天之道也達於天下國家者  
事也所以治人之情也理與事一而二二而一者也  
示之以禮而人得禮以生則謀之作者弭兵之起者  
消故天下國家可得而治也不然雖有粟吾得而食



諸

言偃復問曰夫子之極言禮也可得而聞與孔子曰我欲觀夏道是故之杞而不足徵也吾得夏時焉我欲觀殷道是故之宋而不足徵也吾得坤乾焉坤乾之義夏時之等吾以是觀之

鄭氏曰杞夏后氏之後也徵成也無賢君不足與成也得夏四時之書其書存者有小正宋殷人之後也得殷陰陽之書其書存者有歸藏吾觀於二書之意

孔氏曰自此至禮之大成也為第三明禮之所起徵者徵驗之義杞宋君闇弱不堪足與成禮因往適杞宋得殷坤乾之書并夏四時之書觀之知上代以來至於今世時代運轉禮之變通即下禮之初以下是也殷易以坤為首故先坤後乾

橫渠張氏曰坤乾之義先曰坤者殷之質以所先見者則先言之坤乾書名也不曰乾坤而曰坤乾者乾則無以見必因坤而著故先曰坤推本而言也猶言

形神人必因形乃見神若不因形則神何附著

長樂陳氏曰夏時坤乾之書固不可得而見之然必  
其名以推其義則夏時者言夏時之所紀而坤乾有  
交泰之意也夫得其書則繫其所得之先後故先夏  
時而後坤乾觀其書則考近以及遠故先坤乾而後  
夏時 又曰其言夏時之等則其所得者不止於此  
其言吾以是觀之則繼之以夫禮之初以下蓋觀是  
書而知其然

嚴陵方氏曰極之為言至也如上所言皆禮之至矣子游故復問之也坤乾夏時之書所謂雖無老成人尚有典刑是也論語兼言書之文不足徵此特言人之獻不足徵者言其略則文獻皆不足徵言其詳則書之文猶有得焉耳周官大卜掌三易之法一曰連山二曰歸藏三曰周易是連山則首乎艮其卦具內外而一體其位居東北之兩間則向乎人之時焉夏用人正故其書以之孔子以夏時稱之者以帝降而

王人時得其正故也歸藏則首乎坤各歸其根密藏  
其用皆陰之所為則合乎地之時焉殷用地正故其  
書以之孔子以坤乾稱之者以資生於丑地為主於  
上故也周易則首乎乾周而復始剛柔相摩皆陽之  
所為則合乎天之時焉周用天正故其書以之孔子  
以乾坤序之者以資始於子天為主於上故也然孔  
子以夏殷之易而觀夏殷之禮者何也蓋易之所見  
者象禮之所形者器繫辭云以制器者尚其象則觀

易固可以知禮矣且乾坤者天地也夏時者四時也  
天地有上下之位四時有先後之序禮之道如斯而  
已至周則監於二代修而兼用之故六官則備天地  
四時之名焉坤乾不謂之書而謂之義夏時不謂之  
書而謂之等者禮以達義於內辨等於外者也天地  
之理為妙故以義言內四時之迹為顯故以等言外  
或言其義或言其等蓋本諸此

馬氏曰創於始者必有以繼於終作於先者必有以

述於後故孔子欲觀夏殷之道以成一代之禮杞者  
夏之後宋者殷之後謂其世守而知其事之詳且悉  
也然而杞宋皆無賢人載籍俱亡文獻兩泯焉此其  
不足與成也可知夏時坤乾皆不行於世闕而勿論  
可也

山陰陸氏曰雖曰吾以是觀之蓋亦略矣據論語所  
言可知

講義曰孔子嘗曰殷因於夏禮所損益可知也周因

於殷禮所損益可知也其或繼周者雖百世可知也  
今以為不足證而不言者蓋所語偃者必欲有所稽  
考而言之故也若夫子之於禮雖百世其可知況於  
夏殷乎故曰坤乾之義夏時之等吾以是觀之所以  
語偃者如此也

四明沈氏曰義是禮之變處等是禮之常處首坤次  
乾之書是變也建寅之書是常也聖人加一義字於  
坤乾加一等字於夏時夏殷之書固是夏殷之禮非



聖人孰能觀之哉

蔣氏曰禮在聖人言之為無盡禮在學者問之惟恐其不及此言偃所以得聞其槩而猶有以究其極也夫聖人既以杞宋為不足證而不能覩夏商之禮矣而猶有得於書者何哉此蓋聖人觀禮之妙旨三代聖人損益不同而制作殊事蓋本自其陰陽之義而發之夏時之書吾不得而見之矣而其存者有小正夏之所建以寅為正則其尚忠尚黑之制皆自此出

也坤乾之書吾不得而見之矣而其存者有歸藏商  
之序易以坤為首則其尚質尚白之制皆自此出也  
聖人不能考杞宋之餘備見夏商之盛制而能因陰  
陽之書詳識夏商之本旨此聖人之觀禮所以異乎  
人之觀之也韓宣子適魯見易象與魯春秋以為周  
禮盡在魯其觀周其亦聖人之觀夏商也夫

金華應氏曰觀其義與等者聖人之觀異乎他人之  
觀也夫上天下澤所以為禮而坤乾之書顧以坤為

首者有其義也陰陽循環更相為始而夏時必以寅  
為首者有其等也玩乾坤之自下而上則知禮之交  
際者無不通且又有卑法地之意焉玩四時之自始  
而終則知禮之秩序者不可紊且又有無窮之象焉  
夫禮之初始諸飲食其燔黍捭豚汙尊而抔飲蕢桴而  
土鼓猶若可以致其敬於鬼神及其死也升屋而號告  
曰臯某復然後飯腥而苴孰故天望而地藏也體魄則  
降知氣在上故死者北首生者南鄉皆從其初

鄭氏曰言其物雖質略有齋敬之心則可以薦羞於鬼神鬼神饗德不饗味也中古未有釜甑釋米捍肉加於燒石之上而食之耳今北地猶然汙尊鑿地為尊也抔飲手掬之也蕢讀為由聲之誤也由埽也謂搏土為桴也土鼓築土為鼓也升屋而號招之於天也苴或為俎地藏謂葬北首陰也南鄉陽也皆從其初謂今行之然也

孔氏曰此一節論中古祭祀之事及死喪之禮今時

所法於前者從此至禮之大成皆二書所見之事禮以飲食為本但中古質略雖有火化以水洮釋黍米俾析豚肉加於燒石之上而孰之燔黍以下非但可以事生若如也言如此亦可以致其恭敬於鬼神以鬼神饗德不饗味也伏羲為上古神農為中古五帝為下古若易歷三古則伏羲為上古文武為中古孔子為下古若三王對五帝則五帝亦為上古皐引聲之言某謂死者名令其反復魂魄不復然後浴尸而

行舍禮於舍之時飯用生稻之米故云飯腥用上古  
未有火化之法也苴孰者欲葬設遣奠包裹孰肉以  
遣送尸法中古火化之利也天望謂望天招魂地藏  
謂葬以藏尸所以地藏由體魄則降故也所以天望  
由知氣在上故也此非是今世始為此事皆取法於  
上古中古而來故云皆從其初

橫渠張氏曰今享土功不知報日食五穀又不報義  
非所安古之飲食之際其始造飲食如燔黍捭豚汙

尊抔飲之人也夫禮之初始諸飲食飲食固不足以  
為禮然言語有從本說出者則必至微有從末說出  
者則必自近示人之不得已處其始必甚質而漸至  
於文如言禮之初始於拜起亦此類也人之始相見  
則須如此

延平周氏曰上古之世未始知有禮而有禮乃所以  
強世故聖人因其有飲食之大欲而少寓之以節文  
此天下惟知飲食之充欲而不知漸入於節文之中

也所謂飲食者止於燔黍捭豚汙尊抔飲與夫蕢桴  
土鼓凡此不惟可施於人之所交際而猶若可以致  
敬於鬼神蓋亦趨時而已矣臯其復臯者始事之辭  
而有緩意故五門之始謂之臯旣復矣然後祭之則  
飯以腥苴以孰也死者以北首為主入為陰也而又  
有荅陽之意生者以南鄉為主出為陽也而又有荅  
陰之意自蕢桴土鼓而上後世有以備於此者故不  
從其初自升屋而復而下後世無以過於此者故皆



從其初

長樂陳氏曰食之禮始於燔黍捭豚飲之禮始於汙  
尊抔飲蕢桴而土鼓其樂之始歟明堂位曰土鼓蕢  
桴葦籥伊耆氏之樂也然樂以中聲為本土於位為  
中央於氣為中氣而籥之為氣又所以通中聲者也  
伊耆氏之樂始於土鼓中聲作焉中於蕢桴中聲發  
焉終於葦籥中聲通焉樂之所始本於中聲如此豈  
不為中和之紀乎周官籥章中春晝擊土鼓敝豳詩

以逆暑中秋夜迎寒亦如之凡國祈年于田祖歟

雅擊土鼓以樂田畯國祭蜡則歟歟頌擊土鼓以息

老物其意以為王業之起本於歟樂之中本於籥始

於土鼓逆暑迎寒祈年祭蜡皆本始民事而息老物

故所擊者土鼓所歟所歌者歟詩有報本反始之義

焉豈在夫聲音節奏之末節哉此所以猶若可以致

其敬於鬼神也

樂書

又曰體主於骨魄藏於肺知

存於心氣寓於體體魄陰也故降之於下知氣陽也

故升而在上而體魄不言下者以其體魄有滅而無  
存知氣感動而常在北為陰幽而物之所終始南為  
陽明而物之所相見死者所以歸根故必首於陰幽  
終始之地生者所以芸芸故鄉於陽明相見之方此  
古者之所作而後世無以加故曰皆從其初 又曰  
臯者求之於陰也詩曰鶴鳴于九臯易曰鶴鳴在陰  
則臯者陰之體而陰者臯之理五門之外謂之臯門  
以其近君者為陽遠君者為陰也

嚴陵方氏曰觀二書足以知夏殷之禮觀夏殷足以知上古之禮故此言禮之初焉自燔黍而下皆始諸飲食之事也方是時地產之穀不過有黍然未有釜甑也故燔之天產之物不過有豚然未有刀匕也故俾之尊未能鑿木也故污尊飲未知用爵也故挾飲鬼神之道幽而難格菲薄之禮疑若不及以致其敬也故以猶若言之可疑之辭也復者招魂之名飯必以腥慮致生之不知故也苴必以孰又慮致死之不

仁故也後世於喪有奠始於飯腥而已於葬有遣始於苴孰而已體有所附魄有所營皆重濁焉則陰之類也故降而在下知無不周氣無不之皆輕清焉則陽之類也故升而在上郊特牲不言體魄而言形魄不言知氣而言魂氣者亦互相備也死者仆故言首生者興故言鄉凡是禮也後世雖或增其文而不能損禮之實雖或異其迹而不能易禮之意故曰皆從其初

山陰陸氏曰蕢桴以蕢盛塊而為桴歟

廬陵胡氏曰蕢草也以草為桴鄭以蕢為缶非也若云誤聲不應明堂位又誤也土鼓廣雅文云築土為鼓蓋築地以當鼓節籥章註以瓦為匡不必築土也汙尊鑿地汙下以盛酒杯若張釋之云一抔土據明堂位云蕢桴土鼓伊耆氏之樂則此皆神農氏伊耆神農皆從其初皆取法於古初

蔣氏曰生養之道本於飲食聖人以報本反始之義

教天下欲其事死如事生此酌獻饋食之事所以交  
於鬼神而不以為煩也降及後世人之所以從事乎  
此者一切以文物為先而不以誠敬為本生或怠於  
養死或忽於報聖人言禮所以必欲反之其於初上  
古鼎飪未具而燔捫以為食罍酌未設而汙抔以為  
飲聲樂未備而蕢土以為歡彼其所交際應酬者簡  
素質實而巧偽不形則以此而接乎鬼神自其一念  
之誠而施之有餘也死生異域疑若恩棄義絕而不

相求矣乃若升屋之號臯復之告飯腥苴孰以繼其  
孝養之事天望地藏以發其悽愴之思蓋雖禮教未  
備而天理之發露於人心者自然如此至於後世棺  
槨衣衾之備美賄賻贈舍之畢陳而一念不居事亦  
末矣記曰復盡愛之道也有禱祠之心焉若是則形  
魄歸地知氣歸天死者北首生者南鄉以生求死安  
得不盡其心而後知求加乎物哉故曰皆從其初  
昔者先王未有宮室冬則居營窟夏則居橧巢未有火



化食草木之實鳥獸之肉飲其血茹其毛未有麻絲衣其羽皮

鄭氏曰寒則纍土暑則聚薪柴居其上未有火化食腥也此皆上古之時也

孔氏曰此一節更論上古之事未有宮室則是五帝以前未有火化則惟伏羲以前以中古神農有火故也營窟者地高則穴於地地下則營纍其土而為窟櫓巢者櫓聚其薪以為巢雖食鳥獸之肉不能飽者

則茹食其毛漢蘇武以雪雜羊毛食之是其類也

長樂陳氏曰人之生也雖稟於陰陽而其體則陽屬以其陽屬則必順陽而居之故冬則陽燠於下則順之而居窟夏則陽燠於上則順之而居巢也

嚴陵方氏曰孟子所謂下者為巢上者為營窟是矣前既言燔黍矣此乃未有火化者先儒謂加黍於燒石之上非火化故也

後聖有作然後修火之利范金合土以為臺榭宮室牖

戶以炮以燔以亨以炙以為醴酪治其麻絲以為布帛以養生送死以事鬼神上帝皆從其朔

鄭氏曰作起也修火之利謂孰治萬物范金謂鑄作器用合土謂瓦瓴甕及甒臺榭器之所藏也炮謂裹燒之也燔謂加於火上烹謂煮於鑊也炙謂貫之火上醴酪謂蒸釀之也酪酢載朔亦初也亦謂今行之然

孔氏曰此一節論中古神農及五帝三王之事世本

云燧火出火在伏羲之前但用之簡少至神農更修  
益使多故云修孰謂烹煮治謂陶鑄為形范以鑄金  
器和合其土燒作器物以為臺榭宮室牖戶及炮燔  
醴酪等皆五帝也此皆倣法上古以來故云皆從其  
朔

長樂劉氏曰火無形也而潛於木中不可得以知之  
燧人氏鑽木以出火然後木也火也為民之利矣金  
得火則鎔又從而範之以為器用則金也始為吾民

之利矣土也和之以水鈞之以木化之以火合五材  
以為器則利於吾民與稼穡均矣五行之利養於民  
而禮因五物以興焉生則養之死則祭之報本反始  
之心生而禮由之弗敢忘乎其本初也

長樂陳氏曰范金合土固不止於為宮室之具而為  
宮室則必在於范金合土之後以其斤斧瓦甃之所  
當先也夫營窟櫓巢而易之以宮室飲血茹毛而易  
之以烹炙衣羽而易之以治麻之布衣皮而易之以

治絲之帛此所謂通其變使民不倦者也夫開端之始謂之初繼終而有始謂之朔故天地之始亦可以言初一月之始則特謂之朔是以言禮之初則繼之以皆從其初言後世有作則繼之以皆從其朔也江陵項氏曰前言皆從其初後言皆從其朔註皆以爲初蓋初者天地形氣之始也朔者隨時制作之始也如歷家太初及中朔之類詳本章事理可見嚴陵方氏曰上世未有火化非無火之性也特未能

修之以利人爾范即荀况所謂刑范之范范金而鑄之合土而陶之而器用出焉則以為臺榭宮室牖戶故也臺榭宮室已見月令解醴酪則下文所言者是矣治麻所以為布治絲所以為帛夫為宮室之類然後足以代巢窟為醴酪之類然後足以代血毛為布帛之類然後足以代羽皮是道也不特可以養生於其始又可以送死於其終不特可以養生送死於其明又可以事鬼神上帝於其幽言神則百神上帝則

天也

山陰陸氏曰此一節言禮雖未之有先王以義起至是而彌文養生送死以事鬼神上帝蓋備矣非人為也故曰皆從其朔

關

氏曰皆從其朔者天左旋日月右行周天三百六十五度四分度之一日行遲日行一度一歲一周天月行疾日行十三度一月一周天防其舒前速後近一遠三則為弦相與為衡分天之中則為望以速及



遲光盡體復則為晦至於朔則日月始合璧焉當其  
晦則盡矣及其朔則受明於日而復生也於北謂之  
朔方者民窮度食而變於朔也於冬謂之朔易者存  
察其事而始於朔也禮以時為大則其窮而變變而  
通後聖有作述而從之豈不謂之朔乎是故結繩之  
治其敝如晦焉後聖有作易之以書契則從書契者  
以是為朔也巢穴之居其敝如晦焉後聖有作易之  
以棟宇則居棟宇者以是為朔也羽毛之衣不可用

也故易之以絲麻者得不以是為朔乎飲血茹毛不可用也則從火化者得不以是為朔乎夏尚忠忠之敝故商人救之以質則在商之世所從者以質為朔商尚質質之敝故周人救之以文則在周之世所從者以文為朔而已然則朔者可復晦也晦者亦可復朔也

蔣氏曰聖人論禮蓋本於中古之世器用漸設文物漸備幸其有加於前而慮其或窮於後也夫營窟櫓

巢而必至於臺榭宮室也草實獸肉而必至於烹燔  
炮炙也飲血茹毛而必至於醴酪以供其味也衣羽  
服皮而必至於布帛以充其美也亦天下之勢也夫  
是數者中古聖人實為之中古聖人亦豈能計其事  
之止於此而已哉器利用便而文日加焉而又為之  
黼黻文繡之美三牲九鼎之盛堂上堂下之陳自是  
文日生而無有窮已雖聖人亦未如之何此所以禮  
至於後世而老氏之徒指為忠信之薄欲與天下相

從於淡泊之地也雖然事之已備聖人不能計其後  
事之未備聖人不能秘其智自范金合土以下皆聖  
人開物成務以教天下而使之相安相養於利用出  
入之間者也使稍變其燔黍捭豚以為籩豆簠簋之  
實汙尊抔飲以為犧象山罍之具蕢桴土鼓以為笙  
鏞管象柷敔塤箎之聲何病於聖故聖人觀夏商以  
前為禮之大意知其養生送死事鬼敬神而次第可  
以章明顯設民猶未厭道猶未瀆也故曰以養生送

死以事鬼神上帝皆從其朔朔亦初義過此以往不復言初而禮備矣

臨川王氏曰皆從其初皆從其朔或言初或言朔何也初者一始而不可變朔則終而復始故於始諸飲食則言初於後聖有作則言朔蓋先王為後世所因乃其所以為朔也

禮記集說卷五十四

謹案第二十一頁後一行以為大人之禮刊本人  
訛夫據經文改

第二十四頁後五行則自山川宗廟五祀百神刊  
本自訛有今改

第二十六頁前七行為其在人而不忽其在已者  
刊本忽訛忍今改

第二十六頁後二行達于喪祭射御冠昏朝聘者  
刊本脫朝聘二字據經文增

第二十六頁後三行禮之為道則尊刊本尊訛達

據義疏改

第四十頁前六行伊耆氏之樂刊本耆訛著今改  
第四十一頁前四行生者所以芸芸句疑有誤

第四十三頁前二行所以交於鬼神而不以為煩  
也刊本於訛與今改





覆校官編修臣項家達

校對官檢討臣王坦修

謄錄監生臣李溥